

### Utusan Malaysia Julai 2018

Bil.	Tarikh	Tajuk Berita	Catatan	Muka Surat
1.	03 Julai 2018	Kata dua SPRM kepada pemilik 408 akaun berkaitan 1MDB	KETUA Pesuruhjaya SPRM, Datuk Seri Mohd. Shukri Abdull	3
2.	03 Julai 2018	Selewang dana RM25 juta, SPRM siasat pegawai kanan bergelar Datuk di Finas	Suruhanjaya Pencegahan Rasuah Malaysia (SPRM)	4
3.	03 Julai 2018	Siasatan dalaman isu 64 lot penjualan tanah DBKL	Menteri Wilayah Khalid Abdul Samad	5
4.	04 Julai 2018	Najib akan didakwa dengan 10 pertuduhan pecah amanah	1MDB	7
5.	10 Julai 2018	SPRM diminta siasat tiga projek mega Terengganu	PENGERUSI PAN Terengganu, Datuk Raja Kamarul Bahrin Shah Raja Ahmad	9
6.	10 Julai 2018	Peruntukan bina dan naik taraf BELB diberikan Kementerian Pembangunan Luar Bandar	MENTERI Muda Elektrik Luar Bandar, Dr. Abdul Rahman Junaidi	10
7.	10 Julai 2018	Peguam negara Switzerland jumpa Tommy Thomas bincang siasatan 1MDB	Peguam Negara, Tommy Thomas	12
8.	10 Julai 2018	Pan Borneo akan distrukturkan semula	Menteri Pembangunan dan Infrastruktur, Datuk Peter Anthony	14
9.	10 Julai 2018	Prasarana diarah semak semula kos projek LRT3	Menteri Kewangan, Lim Guan Eng	16
10.	11 Julai 2018	Prasarana jalin kerjasama dengan Kementerian Kewangan, turunkan kos LRT3	Menteri Kewangan, Lim Guan Eng	17
11.	13 Julai 2018	2 rakan didakwa terima rasuah bantu proses urusan sijil kematian	Suruhanjaya Pencegahan Rasuah Malaysia (SPRM)	18
12.	19 Julai 2018	SPRM ambil dokumen berkaitan projek MPP, TSGP dan ECRL	Suruhajaya Pencegahan Rasuah Malaysia (SPRM)	20
13.	19 Julai 2018	Projek MPP, TSGP, ECRL : SPRM masih teliti dokumen	Suruhajaya Pencegahan Rasuah Malaysia (SPRM)	21
14.	19 Julai 2018	SPRM keluarkan waran tangkap dua bekas pegawai eksekutif 1MDB	Suruhajaya Pencegahan Rasuah Malaysia (SPRM)	22
15.	24 Julai 2018	Dua pegawai kanan BTN antara lima ditahan SPRM	Suruhajaya Pencegahan Rasuah Malaysia (SPRM)	23

<b>Bil.</b>	<b>Tarikh</b>	<b>Tajuk Berita</b>	<b>Catatan</b>	<b>Muka Surat</b>
16.	25 Julai 2018	Tuntuan palsu: Lima rermasuk dua Penolong Pengarah Kanan BTN direman	Suruhajaya Pencegahan Rasuah Malaysia (SPRM)	24
17.	25 Julai 2018	Ketua balai bomba didakwa salah guna kuasa	Suruhajaya Pencegahan Rasuah Malaysia (SPRM)	26
18.	26 Julai 2018	2 pegawai kanan BTN antara lima direman	Suruhajaya Pencegahan Rasuah Malaysia (SPRM)	28
19.	30 Julai 2018	Rasuah, tiga lelaki didenda RM10,000, dipenjara sehari	Suruhajaya Pencegahan Rasuah Malaysia (SPRM)	30
20.	30 Julai 2018	Pengurus kanan kewangan Nafas ditahan SPRM	Suruhajaya Pencegahan Rasuah Malaysia (SPRM)	32
21.	30 Julai 2018	Kontraktor Satu direman tujuh hari	Suruhajaya Pencegahan Rasuah Malaysia (SPRM)	33
22.	31 Julai 2018	Bekas kakitangan mahkamah didakwa salah guna wang denda RM61,000	Suruhajaya Pencegahan Rasuah Malaysia (SPRM)	34

**1. Kata dua SPRM kepada pemilik 408 akaun berkaitan 1MDB**



**KETUA Pesuruhjaya SPRM, Datuk Seri Mohd. Shukri Abdull (duduk, kanan) bersama Presiden Transparency International Malaysia, Datuk Seri Akhbar Satar ketika sidang akhbar di Gerak Budaya, Petaling Jaya hari ini**

KUALA LUMPUR 3 Julai - Kesemua pemilik 408 akaun yang dibekukan kerana dipercayai terlibat menerima dana daripada 1Malaysia Development Berhad (1MDB) akan dilucutkan harta dan disaman sekiranya gagal memberikan kerjasama terhadap siasatan dijalankan.

Ketua Pesuruhjayanya, Datuk Seri Mohd. Shukri Abdull berkata, wang yang diterima individu, parti politik serta pertubuhan bukan kerajaan (NGO) daripada 1MDB dianggap sebagai wang haram.

"Sekiranya mereka gagal tampil secara sukarela, tindakan undang-undang akan dikenakan," katanya di sini hari ini.

Beliau berkata demikian dalam sidang akhbar selepas merasmikan pelancaran buku 'Corruption and Crime in Malaysia: Perception or Reality?' yang ditulis Presiden Transparency International Malaysia, Datuk Akhbar Satar di Gerak Budaya, Petaling Jaya, di sini.

Semalam, media melaporkan pasukan Petugas Khas (Task Force) 1MDB telah membekukan sebanyak 408 akaun bank melibatkan dana RM1.1 bilion daripada akaun-akaun milik individu, parti politik serta NGO pada 26 dan 29 Jun lalu.

Akaun yang dibekukan turut membabitkan 81 individu serta 55 buah syarikat yang dipercayai pernah menerima dana daripada 1MDB

## 2. **Seleweng dana RM25 juta, SPRM siasat pegawai kanan bergelar Datuk di Finas**

KUALA LUMPUR 3 Julai - Seorang Datuk disiasat Suruhanjaya Pencegahan Rasuah Malaysia (SPRM) kerana dipercayai terlibat dakwaan penyelewengan dana Suruhanjaya Komunikasi Multimedia Malaysia (SKMM) bernilai kira-kira RM25 juta dipercayai digunakan untuk projek 1Malaysia Ngaraku.

Menurut sumber, Datuk yang merupakan pegawai kanan di Perbadanan Kemajuan Filem Nasional (Finas) itu disyaki terlibat dalam penyelewengan dana membabitkan 10 projek di bawah projek berkenaan.

Ujarnya, siasatan awal mendapati pegawai kanan tersebut terlibat dalam hampir kesemua projek itu.

"Selain itu, Datuk terbabit juga diarahkan oleh Bekas Menteri SKMM untuk menguruskan perolehan dan pembayaran di Finas berkaitan projek ini yang mana individu tersebut mempunyai kuasa untuk menandatangani surat tawaran kepada syarikat-syarikat yang dilantik melalui arahan menteri tersebut.

"Berikutan itu, pegawai kanan tersebut juga dikatakan bersekongkol dengan syarikat-syarikat terbabit dengan meluluskan semua pembayaran bagi projek yang tidak dilaksanakan," katanya di sini hari ini

### 3. Siasatan dalaman isu 64 lot penjualan tanah DBKL



**Khalid Abdul Samad dipakaikan tag nama oleh Ketua Setiausaha Kementerian Wilayah, Datuk Seri Adnan Md. Ikhsan pada hari pertamanya bertugas di Putrajaya, semalam**

PUTRAJAYA 3 Julai - Kementerian Wilayah akan menjalankan siasatan dalaman berhubung penjualan 64 lot tanah kerajaan oleh Dewan Bandaraya Kuala Lumpur (DBKL) kepada pemaaju, dalam masa terdekat ini.

Menterinya, Khalid Abdul Samad berkata, pihaknya akan memberi kerjasama penuh kepada Suruhanjaya Pencegahan Rasuah Malaysia (SPRM) dalam menyiasat sekiranya ada unsur salah guna kuasa, penyelewengan dan rasuah.

Bagaimanapun, beliau berkata, perkara itu tidak dibincangkan pada hari pertama memulakan tugas.

"Ini hari pertama saya di kementerian. Saya tidak mahu jadi macam penyiasat. Saya mahu tangani semua dan bukan hendak tengok satu isu.

"Saya akan meneliti isu itu dan menjalankan kajian dalaman. Kita tidak menghalang SPRM melakukan siasatan," katanya kepada pemberita selepas sesi taklimatnya di Menara Seri Wilayah di sini hari ini.

Sebelum Ini, Ahli Parlimen Kepong (DAP), Lim Lip Eng membuat laporan meminta SPRM menyiasat segera kes penjualan 64 bidang tanah berkeluasan 171 hektar pada harga RM4.28 bilion kepada Yayasan Wilayah Persekutuan pada 2013 melibatkan bekas menterinya, Datuk Seri Tengku Adnan Tengku Mansor.

Khalid berkata, pihaknya tidak akan berkompromi jika ada salah laku serta mengutamakan ketelusan, integriti, amanah dan tanggungjawab dalam kalangan warga Kementerian.

Mengenai projek River of Life, beliau berkata, ia antara projek yang akan diberi tumpuan khususnya isu kebersihan, pengurusan sisa dan kesedaran umum.

Dalam perkembangan sama, Khalid memberitahu bahawa beliau akan melawat kesemua agensi di bawah kementeriannya termasuk di Labuan bagi mendapatkan gambaran lebih jelas mengenai perjalanan pentadbiran dan suasana di setiap agensi agar khidmat kepada penduduk di wilayah dapat dilaksanakan dengan cemerlang.

#### 4. Najib akan didakwa dengan 10 pertuduhan pecah amanah



KUALA LUMPUR 4 Julai - Kompleks Mahkamah Kuala Lumpur di Jalan Duta menjadi tumpuan perhatian pagi ini bila bekas Perdana Menteri Datuk Seri Najib Tun Razak dijangka didakwa berhubung pemindahan RM42 juta ke dalam akaun peribadi beliau dari bekas anak syarikat 1MDB, SRC International Sdn Bhd.

Najib, yang akan mencecah usia 65 tahun pada 23 Julai, dijangka didakwa di Mahkamah Sesyen Jenayah 2, yang terletak di Aras 4, sayap kanan, Kompleks Mahkamah Kuala Lumpur.

Beliau dijangka menghadapi lebih 10 tuduhan melakukan pecah amanah oleh seorang petugas awam atau agen yang dikaitkan dengan kes SRC International Sdn Bhd di bawah Seksyen 409 Kanun Keseksaan yang membawa hukuman penjara tidak kurang daripada dua tahun dan tidak lebih 20 tahun, beserta sebatan dan boleh dikenakan denda.

Tommy Thomas akan muncul buat kali pertama dengan tugas baharunya sebagai Peguam Negara dalam kes terhadap bekas perdana menteri itu.

Peguam bela terkemuka itu akan mengetuai pasukan pendakwa.

Difahamkan kes itu akan disebut di hadapan Hakim Mahkamah Sesyen paling kanan iaitu Datuk Zainal Abidin Kamarudin dan kemudian dipindahkan ke Mahkamah Tinggi Jenayah 1 di hadapan Hakim Datuk Azman Abdullah.

Tuduhan itu dijangka dibacakan kepada Najib di Mahkamah Sesyen dan tidak ada pengakuan direkodkan daripada beliau. Pengakuan akan hanya direkodkan bila kes beliau dipindahkan ke Mahkamah Tinggi di aras 4.

Dalam kalangan enam bekas Perdana Menteri Malaysia, Najib adalah yang pertama menghadapi dakwaan jenayah.

Najib ditahan di rumahnya di Jalan Langgak Duta, di Kuala Lumpur pada 2.35 petang Selasa oleh Suruhanjaya Pencegahan Rasuah Malaysia (SPRM) berhubung siasatan SRC International.

Bekas Perdana Menteri itu telah hadir ke ibu pejabat SPRM dua kali bagi merekodkan keterangan berhubung kes SRC International.

SRC International ialah anak syarikat 1MDB sehingga ia diletakkan di bawah Kementerian Kewangan pada 2012.-

5. **SPRM diminta siasat tiga projek mega Terengganu**



**PENGERUSI PAN Terengganu, Datuk Raja Kamarul Bahrin Shah Raja Ahmad membuat tiga laporan kepada SPRM berhubung gesaan melakukan siasatan terhadap tiga projek mega di Terengganu di Ibu Pejabat SPRM hari ini. -**

PUTRAJAYA 10 Julai - Parti Amanah Negara (PAN) Terengganu menggesa Suruhanjaya Pencegahan Rasuah Malaysia (SPRM) membuka semula siasatan kes runtuh bumbung Stadium Sultan Mizan Zainal Abidin, Kompleks Sukan Negeri di Gong Badak, Terengganu.

Pengerusinya, Datuk Raja Kamarul Bahrin Shah Raja Ahmad berkata, gesaan itu kerana sejak kes tersebut disiasat punca masalah runtuh itu tidak pernah diumumkan sehingga hari ini termasuk tiada pendakwaan utama.

"Oleh itu hari ini saya datang ke SPRM bagi membuat laporan untuk meminta SPRM membuka semula kes runtuh bumbung stadium berkenaan.

"Kita bimbang jika tiada tindakan, dibimbangi kes seumpama ini akan berulang lagi dengan akibat yang lebih dasyat," katanya pada pemberita di luar bangunan Ibu Pejabat SPRM di sini hari ini.

Dalam pada itu, Raja Kamarul Bahrin turut membuat dua lagi laporan kepada SPRM untuk meminta suruhanjaya itu menyiasat dua lagi projek mega di Terengganu yang didakwa sebagai bermasalah iaitu Taman Ilmu di Tembila, Besut dan projek Kompleks Bebas Cukai Kenyir.

Menurutnya, ketiga-tiga projek mega yang dilaksanakan kira-kira 10 tahun lalu itu telah melibatkan kos perbelanjaan hampir RM1 bilion namun sehingga hari ini ia belum dapat digunakan oleh rakyat di Terengganu.

6. Peruntukan bina dan naik taraf BELB diberikan Kementerian Pembangunan Luar Bandar



**MENTERI** Muda Elektrik Luar Bandar, Dr. Abdul Rahman Junaidi (tengah) berbincang sesuatu ketika menghadiri Mesyuarat Pertama bagi Penggal Ketiga Undangan Negeri Sarawak ke- 18 sebentar tadi.

KUCHING 10 Julai - Peruntukan bagi membina dan menaik taraf transformer Bekalan Elektrik Luar Bandar (BELB) ditanggung oleh Kementerian Luar Bandar dan Wilayah yang kini dikenali sebagai Kementerian Pembangunan Luar Bandar.

Menurut Menteri Muda Elektrik Luar Bandar, Dr. Abdul Rahman Junaidi, peruntukan tersebut termasuk menyediakan projek bekalan elektrik luar bandar di seluruh negeri ini.

"Tugas memantau bebanan kapasiti transformer berkenaan dijalankan oleh pihak Sarawak Energy Berhad (SEB) khasnya di luar bandar.

"Sekiranya kapasiti transformer itu melebihi tahap 80 peratus maka SEB akan menjalankan kerja menaik taraf bagi pihak Kementerian Pembangunan Luar Bandar," katanya.

Beliau berkata demikian ketika menjawab soalan lisan Datuk Ranum Mina (PBB-Opar) mengenai peruntukan kementerian untuk kerja menaik taraf transformer BELB pada Mesyuarat Pertama bagi Penggal Ketiga Dewan Undangan Negeri Sarawak Ke-18 di sini sebentar tadi.

Menjawab soalan tambahan Ranum mengenai kos pembinaan dan naik taraf berkata, kos pemasangan dan naik taraf pula, beliau berkata, transformer itu termasuk dalam kos projek baharu BELB manakala yang bukan dalam pelaksanaan projek itu ditanggung SEB.

"Secara purata kos utk menaik taraf sebuah transformer 50 kilovolt-ampere (kVA) kepada 160 kVA adalah kira-kira RM20,000 tidak termasuk kos pemasangan manakala jumlah keseluruhannya dianggarkan sehingga RM80,000," jelasnya

**7. Peguam negara Switzerland jumpa Tommy Thomas bincang siasatan 1MDB**



**PEGUAM Negara, Tommy Thomas (kanan) hari ini mengadakan pertemuan dengan Peguam Negara Switzerland, Michael Lauber bagi membincangkan kerjasama dalam siasatan skandal 1Malaysia Development Bhd. (1MDB**

KUALA LUMPUR 10 Julai - Peguam Negara, Tommy Thomas hari ini mengadakan pertemuan dengan Peguam Negara Switzerland, Michael Lauber bagi membincangkan kerjasama dalam siasatan skandal 1Malaysia Development Bhd. (1MDB).

Menurut satu kenyataan pejabat Peguam Negara Switzerland (OAG) berkata, Lauber dan delegasi negaranya menerima jemputan daripada Tommy dan pegawai dari Jabatan Peguam Negara untuk mengadakan mesyuarat di sini.

Kata kenyataan itu, perbincangan mereka bertumpu kepada keperluan untuk mengukuhkan komitmen bersama terhadap kedaulatan undang-undang atau 'rule of law' dan pemulihan bantuan perundangan secara bersama di antara dua bidang kuasa.

Menurut OAG, enam individu sedang dalam siasatan dan dua buah bank disyaki turut terlibat.

Siasatan tersebut dibuka sebagai maklum balas laporan Money Laundering Reporting Office Switzerland (MROS) dan analisis yang dibuat olehnya melalui maklumat yang diterima daripada OAG.

"Pembiayaan tersebut diperuntukkan untuk pelaburan dalam projek pembangunan khususnya PetroSaudi, Tanjung/Genting dan projek kecil di bawahnya serta projek pelaburan SRC yang melibatkan sumber asli.

"Semua atau sebahagian daripada pembiayaan yang diperoleh didakwa telah digunakan untuk tujuan lain, terutamanya untuk tujuan peribadi orang yang terlibat," katanya.

Pada 14 Ogos 2015, OAG membuka prosiding bagi menentang dua bekas pegawai di 1MDB dan individu tidak dikenali kerana disyaki merasuah pegawai awam asing, salah laku di pejabat, pengubahan wang haram dan salah laku jenayah.

Katanya, siasatan tersebut telah dilanjutkan pada April 2016 bagi melibatkan dua bekas pegawai dari Arab Saudi yang bertanggungjawab di dalam pengurusan dana berdaulat Abu Dhabi.

"Mereka disyaki kerana melakukan penipuan, salah laku jenayah, salah laku di pejabat awam, pemalsuan dokumen, rasuah pegawai awam asing dan pengubahan wang haram," katanya.

Pada November tahun lalu, prosiding lanjutan dibuka terhadap dua pegawai dari PetroSaudi Group atas dakwaan salah laku jenayah, melakukan penipuan bagi keuntungan komersil, rasuah pegawai awam asing, pengubahan wang haram dan salah laku di pejabat awam.

"Salah seorang daripada dua suspek juga disyaki memalsukan dokumen," kata OAG, sambil menambah bahawa bekas perdana menteri, Datuk Seri Najib Razak Tun Razak bukanlah salah seorang pegawai awam yang dituduh. Pada Mei 2016, satu prosiding jenayah dibuka terhadap Bank BSI BA kerana OAG mengesyaki sesuatu dalam organisasi dalaman tersebut.

"Adalah dipercayai disebabkan oleh kelemahan ini, bank tersebut tidak dapat menghalang perlakuan jenayah yang sedang disiasat.

"Dalam kes sama, pada Oktober 2016, OAG membuka kertas siasatan terhadap Falcon Private Bank SA kerana disyaki kerana kelemahan organisasi, ia mungkin telah membenarkan salah laku yang sedang disiasat dalam prosiding jenayah berkaitan dengan 1MDB," katanya.



#### 8. Pan Borneo akan distrukturkan semula

KOTA KINABALU 10 Julai - Kerajaan negeri komited untuk mengkaji semula keseluruhan pelaksanaan projek mega Lebuhraya Pan Borneo Sabah termasuk melakukan penstrukturan terhadap pengurusan bagi mengelakkan sebarang pembaziran serta ketirisan.

Menteri Pembangunan dan Infrastruktur, Datuk Peter Anthony berkata, langkah itu sebagai usaha penambahbaikan yang perlu dilakukan untuk mengatasi beberapa masalah yang wujud termasuk mengenalpasti kaedah mengurangkan kos.

"Kementerian telah diarahkan oleh Ketua Menteri Sabah, Datuk Seri Mohd. Shafie Apdal supaya memperhalusi dan menilai semula kontrak-kontrak bagi projek untuk tujuan penambahbaikan.

"Ini kerana, tiada penglibatan agensi kerajaan seperti Jabatan Kerja Raya (JKR) biarpun untuk tindakan pemantauan dilihat sangat ganjil dia ia perlu dikaji dan dinilai semula. Sebelum ini ianya diserahkan sepenuhnya kepada konsultant yang dilantik," katanya.

Beliau berkata demikian ketika ditemui dalam majlis Rumah Terbuka Aidilfitri Kementerian Pembangunan Infrastruktur yang dihadiri kira-kira 3,000 tetamu terdiri daripada kakitangan agensi kementerian dan orang awam di sini hari ini.

Terdahulu Peter turut menyerahkan sumbangan duit raya kepada 100 orang golongan kurang berkemampuan termasuk anak-anak yatim dan asnaf.

Mengulas lanjut Peter berkata, satu jawatankuasa khas akan ditubuhkan sebagai pihak pemantau bagi memastikan pelaksanaan projek berkenaan dapat diteruskan dan disiapkan dalam tempoh yang ditetapkan.

"Jawatankuasa tersebut terdiri daripada pihak berkepentingan termasuk agensi kerajaan dibawah Kementerian ini dan Kementerian Kewangan.

"Bagaimanapun kerajaan akan berusaha menerusi penambahbaikan yang akan dilakukan ini bakal menjimatkan kos serta untuk menyiapkan projek ini dalam tempoh yang ditetapkan," ujarnya.

Projek tersebut dilancarkan bekas Perdana Menteri, Datuk Seri Najib Tun Razak pada April 2016 menelan belanja sebanyak RM12.8 bilion bakal memberi kemudahan kepada kira-kira 3.7 juta rakyat sekali gus memberi jaminan kepada perkhidmatan pengangkutan bandar dan luar bandar yang lebih kondusif dan selamat.

Fasa pertama projek infrarakyat berkenaan melibatkan jajaran sepanjang 706 kilometer dari Sindumin ke Tanjung Simpang Mengayau di pantai barat dan dari Ranau ke Sandakan, Lahad Datu dan Tawau di pantai timur negeri ini.

Syarikat Borneo Highway PDP Sdn. Bhd. (BHP) yang dipertanggungjawabkan untuk menerajui keseluruhan projek berkenaan meletakkan keyakinan penuh bahawa projek yang sedang giat dilaksanakan menerusi 35 pakej akan siap sepenuhnya seperti yang dijadualkan iaitu 31 Disember 2021.

9. Prasarana diarah semak semula kos projek LRT3



PUTRAJAYA 10 Julai - Kementerian Kewangan mengarahkan Prasarana Malaysia Bhd. (Prasarana) menyemak semula kos projek pembinaan landasan Transit Aliran Ringan 3 (LRT3) bagi memastikan projek tersebut dapat diteruskan.

Menteri Kewangan, Lim Guan Eng berkata, kementerian tidak akan menyokong sebarang pembiayaan tambahan jika tiada pengurangan kos LRT3 yang drastik selain tidak menjejaskan integriti jajaran rel, keselamatan dan kualiti perkhidmatan yang diberikan.

"Baru-baru ini terdapat beberapa laporan media bahawa kos LRT3 boleh dikurangkan sebanyak RM6 bilion.

"Kementerian Kewangan ingin menegaskan bahawa kos projek perlu dikurangkan lebih daripada RM6 bilion supaya projek tersebut dapat diteruskan," katanya dalam satu kenyataan di sini hari ini

10. Prasarana jalin kerjasama dengan Kementerian Kewangan, turunkan kos LRT3



**Masnizam Hisham**

Kuala Lumpur 11 Julai - Prasarana Malaysia Berhad (Prasarana) mengambil maklum kenyataan Menteri Kewangan, Lim Guan Eng berhubung peningkatan kos keseluruhan projek Transit Aliran Ringan 3 (LRT3) dan akan berusaha giat untuk mengurangkan lagi kos tersebut.

Presiden dan Ketua Pegawai Eksekutif Kumpulan Prasarana, Masnizam Hisham berkata, pengurusan Prasarana telah mula mengurangkan kos projek tersebut sejak Februari lalu dan akan terus bekerjasama erat dengan Kementerian Kewangan dan Rakan Penyampai Projek (MRCB-GK) untuk mengenalpasti peluang-peluang tambahan untuk mengurangkan kos projek tersebut.

Semalam, kementerian tersebut mengarahkan Prasarana menyemak semula kos projek pembinaan landasan LRT3 bagi memastikan projek tersebut dapat diteruskan.

Guan Eng berkata, kementerian tidak akan menyokong sebarang pembiayaan tambahan jika tiada pengurangan kos LRT3 yang drastik selain tidak menjejaskan integriti jajaran rel, keselamatan dan kualiti perkhidmatan yang diberikan.

**11. 2 rakan didakwa terima rasuah bantu proses urusan sijil kematian**



**ABU NOOR ABU SAMAH, 61 (belakang) dan rakannya, Noorha Wisma Hisham Abdul Wahab, 48, diiringi keluar dari Mahkamah Sesyen di sini hari ini selepas mengaku tidak bersalah atas empat pertuduhan menerima suapan berjumlah lebih RM150,000 bagi membantu mempercepatkan pembedulan maklumat sijil kematian seorang lelaki, dua tahun lalu**

KUALA LUMPUR 12 Julai - Dua rakan termasuk seorang bekas pekerja Pos Malaysia dihadapkan ke Mahkamah Sesyen di sini hari ini atas empat pertuduhan menerima suapan berjumlah lebih RM150,000 bagi membantu mempercepatkan proses pembedulan maklumat sijil kematian seorang lelaki, dua tahun lalu.

Abu Noor Abu Samah, 61 dan Noorha Wisma Hisham Abdul Wahab, 48, masing-masing membuat pengakuan tidak bersalah selepas pertuduhan dibacakan secara berasingan terhadap mereka di hadapan Hakim Madidah Harullah.

Mengikut pertuduhan pertama, Abu Noor didakwa menerima secara rasuah daripada Pengurus Medan Selera Oasis, Jamilah Mohd. suatu suapan wang tunai sebanyak RM30,000 sebagai upah kononnya membantu mempercepatkan proses pembedulan maklumat pada sijil kematian suami Jamilah, atas nama Abu Bakar S. M. Ashmouni kepada Abu Bakar Sulaiman Ashmoni.

Bagi pertuduhan kedua, tertuduh yang juga bekas pekerja Pos Malaysia, dituduh telah secara rasuah menerima daripada Jamilah melalui madunya, Norma Che Ali, suatu suapan iaitu cek Bank Islam Malaysia Berhad berjumlah RM10,000 atas nama Tangkas Kesuma Sdn. Bhd., sebagai upah kononnya untuk membantu mempercepatkan proses pembedulan maklumat pada sijil kematian suami Jamilah dan Norma.

Bagi pertuduhan ketiga, Abu Noor turut didakwa telah bersubahat menerima daripada Jamilah melalui Norma iaitu suatu suapan iaitu Cek Bank Islam Malaysia Berhad berjumlah RM58,000 atas nama YAM TBPIS SEL sebagai upah kononnya untuk membantu mempercepatkan proses pembetulan maklumat pada sijil kematian suami Jamilah dan Norma.

Dia didakwa melakukan perbuatan itu di Pejabat Medan Selera Oasis, Lot S JA3(A), Tingkat 2, Centre Court, Mid Valley Megamall, Lingkaran Syed Putra, di sini, antara pukul 9.45 malam, 10 Oktober dan 12.30 tengah hari, 16 Februari 2016.

Sementara itu, Noorha Wisma Hisham

didakwa menerima daripada Jamilah, suatu suapan iaitu cek Bank Islam Malaysia Berhad berjumlah RM58,000 atas nama YAM TBPIS SEL, sebagai upah kononnya membantu mempercepatkan proses pembetulan maklumat pada sijil kematian suami Jamilah dan Norma.

Dia didakwa melakukan perbuatan itu di CIMB Bank Berhad, Jalan Tun Perak, di sini, 18 Februari 2016.

Kesemua pertuduhan dikemukakan mengikut Seksyen 16(a)(A) Akta Suruhanjaya Pencegahan Rasuah Malaysia (SPRM) 2009 yang boleh dihukum di bawah Seksyen 24 akta sama yang memperuntukkan hukuman penjara maksimum 20 tahun dan denda lima kali ganda nilai suapan atau RM10,000 mengikut mana-mana yang lebih tinggi.

Pendakwaan dikendalikan oleh Timbalan Pendakwa Raya dari SPRM, Nor Diana Nor Azwa manakala peguam-peguam Datuk Hanif Hassan dan Datuk Sukri Mohamed mewakili Abu Noor dan Noorha Wisma Hisham.

12. **SPRM ambil dokumen berkaitan projek MPP, TSGP dan ECRL**



KUALA LUMPUR 18 Julai - Suruhajaya Pencegahan Rasuah Malaysia (SPRM) hari ini telah mengambil beberapa dokumen berkaitan Saluran Paip Pelbagai Produk (MPP), Saluran Paip Gas Trans-Sabah (TSGP) dan Laluan Rel Pantai Timur (ECRL) melibatkan beberapa buah syarikat.

Kesemua dokumen terbabit telah diambil SPRM di 13 lokasi sekitar Lembah Klang bermula 10 pagi ini.

Menurut sumber, lebih 50 pegawai SPRM telah hadir ke lokasi-lokasi berkenaan dalam untuk mendapatkan dokumen-dokumen tersebut.

Sementara itu, Pengarah Siasatan SPRM, Datuk Simi Abd. Ghani ketika dihubungi mengesahkan perkara tersebut tetapi enggan mengulas lanjut.

### 13. Projek MPP, TSGP, ECRL : SPRM masih teliti dokumen

KUALA LUMPUR 19 Julai - Suruhanjaya Pencegahan Rasuah Malaysia (SPRM) masih dalam peringkat meneliti maklumat yang diterima berhubung isu Saluran Paip Pelbagai Produk (MPP), Saluran Paip Gas Trans-Sabah (TSGP) dan Laluan Rel Pantai Timur (ECRL) sebelum tindakan selanjutnya.

Menurut sumber, meskipun SPRM telah menyerbu 13 lokasi di sekitar Lembah Klang semalam namun masih terdapat beberapa dokumen yang masih belum diperoleh.

Ujarnya, ini kerana, ketika pegawai SPRM hadir ke lokasi tersebut tiada individu berada di situ dan menyebabkan mereka perlu datang semula bagi mendapatkan dokumen terbabit.

"Setakat ini, tiada individu akan dipanggil dan SPRM memerlukan sedikit masa untuk meneliti kesemua dokumen yang diperolehi sebelum tindakan selanjutnya diambil," katanya di sini hari ini.

Sementara itu, Pengarah Siasatan SPRM, Datuk Simi Abd. Ghani ketika dihubungi mengesahkan perkara tersebut tetapi enggan mengulas lanjut

#### 14. **SPRM keluarkan waran tangkap dua bekas pegawai eksekutif 1MDB**

KUALA LUMPUR 19 Julai - Suruhanjaya Pencegahan Rasuah Malaysia (SPRM) mengeluarkan dua waran tangkap terhadap dua bekas pegawai eksekutif 1Malaysia Development Berhad (1MDB).

Menurut sumber, waran tangkap terbabit dikeluarkan terhadap mereka sejak tiga minggu lalu susulan tidak hadir ke pejabat SPRM bagi siasatan lanjut berhubung kes SRC International Sdn. Bhd.

Ujarnya, kedua-dua individu tersebut iaitu Tang Keng Chee, 53, dan Loo Ai Swan, 45.

"SPRM dalam satu kenyataan pada 11 Jun lalu ada memaklumkan meminta mereka hadir ke SPRM bagi siasatan lanjut.

"Namun sehingga kini, mereka tidak hadir. Selain itu, kedua-dua mereka juga turut dikatakan pernah dicari Bank Negara dua tahun lalu bagi kes yang sama," jelasnya.

### 15. Dua pegawai kanan BTN antara lima ditahan SPRM

KUALA LUMPUR 24 Julai - Lima individu termasuk dua Penolong Pengarah Kanan Biro Tatanegara (BTN) ditahan Suruhanjaya Pencegahan Rasuah Malaysia (SPRM) kerana disyaki membuat tuntutan palsu berjumlah RM600,000.

Suspek melibatkan tiga lelaki dan dua wanita yang berusia antara 34 hingga 55 tahun itu ditahan kira-kira pukul 4.30 petang tadi di Pejabat SPRM Sarawak ketika hadir untuk memberi keterangan.

Tiga daripada mereka sebelum ini pernah berkhidmat di BTN Sarawak namun dipindahkan ke jabatan lain serta bersara.

Menurut sumber, mereka dipercayai bersubahat dengan 43 buah syarikat di seluruh Sarawak dengan mengemukakan dokumen yang mengandungi butiran palsu untuk membuat tuntutan pembayaran kerja.

"Jumlah tuntutan bagi satu-satu kerja bernilai antara RM2,000 hingga RM6,000. Kesemua pembayaran telah dibuat ke beberapa akaun pemilik syarikat pada tahun 2016 dan kelima-lima suspek dipercayai mengambil keuntungan daripada setiap syarikat yang dipilih oleh mereka," katanya di sini hari ini.

Sementara itu, Pengarah SPRM Sarawak, Razim Mohd. Noor ketika dihubungi mengesahkan tangkapan tersebut dan menjelaskan pihaknya dalam proses mendapatkan beberapa dokumen berhubung pembayaran yang dibuat itu.

Katanya, kelima-lima suspek ditangkap bagi membantu siasatan mengikut Seksyen 18 Akta Suruhanjaya Pencegahan Rasuah Malaysia 2009.

"Kesemua suspek dijangkan akan direman di Mahkamah Majistret Kuching esok," katanya.

**16. Tuntutan palsu: Lima termasuk dua Penolong Pengarah Kanan BTN direman**



SEMUA suspek direman lima hari bagi membantu siasatan kerana membuat tuntutan palsu sebanyak RM600,000 pada tahun 2016.

KUCHING 25 Julai - Lima individu termasuk dua Penolong Pengarah Kanan Biro Tatanegara direman lima hari bermula hari ini bagi membantu siasatan berhubung membuat tuntutan palsu berjumlah RM600,000 pada 2016.

Perintah tahanan reman dikeluarkan Majistret Mohd. Syukri Mokhtar di Mahkamah Majistret di sini hari ini.

Kesemua suspek terdiri daripada tiga lelaki dan dua wanita berusia 34 hingga 55 tahun disiasat mengikut Seksyen 18 Akta SPRM 2009.

Semalam, kelima-lima suspek ditahan pada pukul 4.30 petang di Pejabat SPRM Sarawak ketika hadir untuk memberi keterangan.

Tiga daripada individu terbabit pernah berkhidmat di BTN Sarawak, namun kini telah berpindah ke jabatan lain dan bersara.

Mereka dipercayai bersubahat dengan 43 syarikat di seluruh Sarawak dengan mengemukakan dokumen yang mengandungi butiran palsu untuk membuat tuntutan pembayaran kerja.

Jumlah tuntutan bagi satu-satu kerja berjumlah antara RM2,000 hingga RM6,000.

Kesemua pembayaran telah dibuat ke beberapa akaun pemilik syarikat pada tahun 2016 dan kelima-  
lima suspek dipercayai mengambil keuntungan daripada setiap syarikat yang pilih oleh mereka.

Siasatan awal mendapati kira-kira 70 peratus perkhidmatan atau pembekalan yang telah dilakukan  
oleh syarikat-syarikat terbabit kepada pihak BTN adalah tidak wujud atau tidak dilaksanakan dalam  
tempoh tersebut.

Kelima-lima suspek yang mempunyai kawalan ke atas akaun BTN disyaki telah menggunakan wang  
tersebut untuk kegunaan peribadi.

**17. Ketua balai bomba didakwa salah guna kuasa**



**KETUA** Balai Bomba dan Penyelamat Peramu Pekan, Pahang, Sheikh Hassan Sheikh Zainuddin, mengaku tidak bersalah atas 10 pertuduhan salah guna kuasa melibatkan penggunaan khidmat syarikat isterinya sejak Mac 2014 ketika dihadapkan ke Mahkamah Sesyen di Kuantan hari ini.

KUANTAN 25 Julai -Seorang ketua balai bomba dan penyelamat mengaku tidak bersalah di Mahkamah Sesyen di sini hari ini atas tuduhan salah guna kuasa membabitkan penggunaan khidmat penyediaan makanan syarikat milik isterinya sejak Mac 2014.

Tertuduh, Sheikh Hassan Sheikh Zainuddin, 53, mohon dibicarakan atas 10 pertuduhan yang dibacakan di depan hakim Mohd. Ghazali Mohamad Taib.

Ketua Balai Bomba Peramu di Pekan, dekat sini itu yang diwakili peguam, Datuk Syed Azimal Amir Syed Abu Bakar didakwa menggunakan kedudukannya untuk mencadangkan syarikat Puncak Cahaya Azam Enterprise bagi pembelian dan penyediaan makanan untuk program serta operasi melibatkan anggota bomba di balai tempat dia berkhidmat antara Mac 2014 hingga 3 Ogos 2015 dengan jumlah keseluruhan sebanyak RM36,279.69.

Pendakwaan dilakukan mengikut Seksyen 23 Akta Suruhanjaya Pencegahan Rasuah Malaysia (SPRM) 2009 yang boleh dihukum mengikut Seksyen 24 akta sama.

Jika sabit kesalahan, individu terlibat berdepan hukuman penjara maksimum sehingga 20 tahun dan denda tidak kurang lima kali ganda jumlah atau nilai suapan, atau RM10,000, mengikut mana-mana yang lebih tinggi.

Kes kendalian Timbalan Pendakwa Raya SPRM, Mohamad Fadhly Mohd. Zamry itu akan disebut semula 16 Ogos ini

### 18. 2 pegawai kanan BTN antara lima direman



DUA pegawai kanan Biro Tatanegara (BTN) dan tiga lagi individu direman lima hari berhubung kes tuntutan palsu RM600,000 pada 2016 di Kompleks Mahkamah Kuching, Sarawak, semalam

KUCHING 25 Julai - Dua Penolong Pengarah Kanan Biro Tatanegara (BTN) dan tiga lagi individu direman lima hari mulai hari ini bagi membantu siasatan berhubung dakwaan membuat tuntutan palsu berjumlah RM600,000, dua tahun lalu.

Perintah reman itu dikeluarkan oleh Majistret Mohd. Syukri Mokhtar setelah membenarkan permohonan

Suruhanjaya Pencegahan Rasuah Malaysia (SPRM) mengikut Seksyen 117 Kanun Prosedur Jenayah setelah kelima-lima suspek itu dibawa ke Mahkamah Majistret di sini.

Kesemua suspek terdiri daripada tiga lelaki dan dua wanita berusia antara 34 hingga 55 tahun direman bagi membantu siasatan mengikut Seksyen 18 Akta SPRM 2009.

Semalam, kelima-lima suspek terbabit ditahan kira-kira pukul 4.30 petang di Pejabat SPRM Sarawak di sini ketika hadir memberi keterangan berhubung dakwaan mengemukakan tuntutan palsu berjumlah RM600,000 pada 2016.

Tiga daripada mereka sebelum ini pernah berkhidmat di BTN Sarawak, namun dipindahkan ke jabatan lain serta bersara.

Mereka dipercayai bersubahat dengan 43 syarikat di seluruh Sarawak dengan mengemukakan dokumen yang mengandungi butiran palsu untuk membuat tuntutan pembayaran kerja.

Jumlah tuntutan bagi satu-satu kerja bernilai antara RM2,000 hingga RM6,000 dan kesemua pembayaran dibuat ke beberapa akaun pemilik syarikat pada 2016.

Kelima-lima suspek dipercayai mengambil keuntungan daripada setiap syarikat yang dipilih oleh mereka.

**19. Rasuah, tiga lelaki didenda RM10,000, dipenjara sehari**



SUBKONTRAKTOR, Tan Kok Aun, 43 (kiri) peniaga kedai telefon, Loo Jiunn Shyan, 27, (tengah) dan pemandu lori, Ooi See Gee, 49, (kanan) masing-masing didenda RM10,000 dan penjara sehari kerana memberi rasuah kepada penguat kuasa bagi mengelak dikenakan tindakan di Mahkamah Sesyen di sini hari ini

ALOR SETAR 30 Julai - Seorang subkontraktor, seorang peniaga kedai telefon dan seorang pemandu lori masing-masing didenda RM10,000 dan penjara sehari oleh Mahkamah Sesyen di sini hari ini kerana memberi rasuah kepada penguat kuasa bagi mengelak dikenakan tindakan.

Hakim Azman Abu Hassan menjatuhkan hukuman itu terhadap subkontraktor, Tan Kok Aun, 43; peniaga kedai telefon, Loo Jiunn Shyan, 27, dan pemandu lori, Ooi See Gee, 49, setelah ketiga-tiga mereka mengaku bersalah atas pertuduhan masing-masing.

Kok Aun didakwa bersalah memberi suapan wang tunai berjumlah RM1,000 kepada Pegawai Antidadah di Agensi Antidadah Kebangsaan (AADK) Kedah, Nasru'ddin Abdul Rahman sebagai dorongan tidak menjalankan ujian air kencing di bawah Akta Penagih Dadah (Rawatan dan Pemulihan) 1983.

Dia didakwa melakukan perbuatan itu di sebuah premis hiburan Twenty 6, Kampung Berjaya di sini pada kira-kira 1.15 pagi, 27 Februari lalu.

Jiunn Shyan pula mengaku bersalah memberi suapan sebanyak RM1,100 kepada Nasru'ddin sebagai dorongan untuk melepaskan isterinya, Shirneen Goh yang disyaki positif dadah dalam ujian saringan air kencing pada kira-kira 2.20 pagi pada hari dan tempat yang sama.

Sementara See Gee didakwa memberi rasuah sebanyak RM1,200 kepada Pembantu Penguat Kuasa Kementerian Dalam Negeri Koperasi dan Kepenggunaan (KPDNKK) Selangor di Lot 36 Kawasan Perindustrian Bukit Kayu Hitam, Kubang Pasu pada kira-kira pukul 11.45 pagi, 20 november 2014.

Wang berkenaan sebagai dorongan pembantu penguat kuasa berkenaan tidak mengambil tindakan terhadapnya kerana disyaki melakukan kesalahan di bawah Peraturan 3(1) Peraturan-peraturan Kawalan Bekalan 1974 iaitu berurusan dengan barang kawalan secara runcit atau barang tanpa lesen.

Kesemua mereka didakwa mengikut Seksyen 17(b) Akta Suruhanjaya Pencegahan Rasuah Malaysia 2009 dan boleh dihukum di bawah Seksyen 24 (1) akta sama yang membawa hukuman penjara tidak lebih 20 tahun dan denda tidak kurang lima kali ganda nilai suapan atau RM10,000, mengikut mana lebih tinggi.

Pendakwaan dikendalikan oleh Pegawai Pendakwa SPRM, Syahrul Khuzaini Amiruddin manakala ketiga-tiga tertuduh tidak diwakili peguam bela

**20. Pengurus kanan kewangan Nafas ditahan SPRM**

KUALA LUMPUR 30 Julai - Seorang Pengurus Kanan Kewangan Pertubuhan Peladang Kebangsaan (Nafas) ditahan Suruhanjaya Pencegahan Rasuah Malaysia (SPRM) hari ini kerana dipercayai menerima rasuah bernilai RM4,000.

Suspek berusia 41 tahun itu ditahan di pejabat SPRM Selangor kira-kira pukul 2.20 petang ini.

Menurut sumber, suspek dipercayai telah menerima wang suapan sebagai dorongan mempercepatkan bayaran bagi tuntutan untuk kontrak menyediakan tenaga kerja, peralatan serta bahan bagi menghantar baja dari gudang Nafas di Kedah dan Sabah.

"Permohonan reman akan dilakukan ke atas suspek esok bagi siasatan lanjut di bawah Seksyen 17(a) Akta SPRM 2009," katanya di sini. -

**21. Kontraktor Satu direman tujuh hari**



SEORANG kontraktor Syarikat Air Terengganu Sdn. Bhd. (Satu) dibawa keluar dari mahkamah selepas menerima perintah reman selama tujuh hari berhubung satu kes tuntutan palsu, di Mahkamah Majistret Kuala Terengganu hari ini.

KUALA TERENGGANU 30 Julai - Seorang kontraktor Syarikat Air Terengganu Sdn. Bhd. (Satu) direman selama seminggu berhubung satu kes tuntutan palsu berjumlah RM11,060 pada Disember tahun lalu.

Perintah reman terhadapnya dikeluarkan oleh Penolong Kanan Pendaftar Mahkamah Sesyen/Majistret Kuala Terengganu, Noradila Ab. Latif di Mahkamah Majistret di sini hari ini.

Suspek lelaki berusia 50 tahun itu dikatakan membuat tuntutan palsu bagi satu projek pengubahsuaian bumbung garaj Depoh Agihan Satu di Gong Badak di sini.

Suspek ditahan di pejabat Suruhanjaya Pencegahan Rasuah Malaysia (SPRM) Kuala Terengganu ketika hadir memberi keterangan kira-kira pukul 5.30 petang, semalam.

Kes disiasat mengikut Seksyen 18 Akta SPRM 2009 yang mana jika sabit kesalahan boleh dikenakan hukuman denda lima kali nilai suapan atau RM10,000 mana yang tinggi dan penjara tidak melebihi 20 tahun.-

**22. Bekas kakitangan mahkamah didakwa salah guna wang denda RM61,000**



BEKAS kakitangan Kompleks Mahkamah Kuala Lumpur dihadapkan ke Mahkamah Sesyen di sini hari ini atas 18 pertuduhan salah guna wang denda RM61,000 yang dibayar oleh 18 individu, tiga tahun lalu

KUALA LUMPUR 31 Julai - Selepas dijatuhi hukuman atas kesalahan menipu dua bulan lalu, seorang bekas kakitangan Kompleks Mahkamah Kuala Lumpur hari ini mengaku tidak bersalah di Mahkamah Sesyen di sini atas 18 pertuduhan salah guna wang denda kes jenayah berjumlah RM61,000 yang dibayar oleh 18 individu, tiga tahun lalu.

Shahnaz Khan Kamarzaman, 37, membuat pengakuan tersebut di hadapan Hakim Azura Alwi atas kesemua pertuduhan yang didakwa dilakukan di Kompleks Mahkamah Kuala Lumpur, Jalan Tuanku Abdul Halim di sini antara pukul 10 pagi dan 4.30 petang, antara 16 Februari 2015 dan 3 Julai 2016.

Mengikut kesemua pertuduhan, Shahnaz Khan didakwa ketika kejadian sebagai Pembantu Operasi di Unit Pendaftaran Mahkamah Sesyen dan Majistret (Jenayah) telah dengan curangnya menyalahgunakan wang tunai RM61,000 yang dibayar oleh 18 individu untuk kes tangkap tertuduh yang didakwa di mahkamah itu.

Bapa dua anak itu didakwa mengikut Seksyen 403 Kanun Keseksaan yang memperuntukkan hukuman penjara maksimum lima tahun dan sebat serta denda, jika sabit kesalahan.

Timbalan Pendakwa Raya, Abdul Rashid Sulaiman daripada Suruhanjaya Pencegahan Rasuah Malaysia (SPRM) mencadangkan jaminan RM70,000 dengan seorang penjamin berserta syarat tambahan tertuduh perlu melapor diri di pejabat SPRM dan pasport diserahkan kepada mahkamah.

Peguam, P.G. Cyril dan Farhan Read yang mewakili Shahnaz Khan memohon jaminan dikurangkan atas alasan anak guamnya tidak mempunyai pekerjaan tetap dan hanya berniaga dengan pendapatan RM1,000 hingga RM1,500 sebulan.

"Tertuduh juga perlu menanggung dua anak yang masih bersekolah dan isteri yang tidak bekerja malah harta dan akaun tertuduh juga telah dirampas dan dibekukan oleh SPRM sejak 11 Januari 2016," katanya.

Mahkamah kemudian membenarkan tertuduh diikat jamin RM35,000 dengan seorang penjamin berserta syarat tambahan pasport perlu diserahkan kepada mahkamah sehingga kes selesai dan menetapkan 17 Ogos ini bagi sebutan kes untuk serahan dokumen.

Pada 8 Mei lalu, Shahnaz Khan dihukum penjara 12 bulan dan sebatan sekali oleh Mahkamah Tinggi di sini setelah didapati bersalah atas pertuduhan menipu seorang wanita untuk mempercayai bahawa dia boleh menolongnya membayar wang denda bagi kes dadah, tiga tahun lalu, namun pelaksanaan hukuman ditangguhkan sementara menunggu rayuan di Mahkamah Rayuan.